

- प्रदेश री सात विधानसभा सीटां माथे उपचुनाव सारू प्रचार रो काम पूरो व्हयो—बुधवार ने वोट पड़े ला।
- प्रधानमंत्री नरेन्द्र मोदी कहयो— दुनिया मांय भारत रा नौजवानां री मांग मांय बधोतरी व्हे रही है।
- न्यायमूर्ति संजीव खन्ना सुप्रीम कोर्ट रा 51वां मुख्य न्यायाधीश बण्या।
- राज्य स्तर रो चंद्रभागा पशु मेळो काल झालरापाटन मांय सरु व्हेला।

000

प्रदेश री सात विधानसभा सीटां माथे 13 नवम्बर ने व्हेवण वाढा उपचुनाव सारू आज सिंज्यां प्रचार रो काम पूरो व्हे ग्यो। प्रचार रा आखिरी दिन आज कांग्रेस अर भाजपा समेत न्यारी—न्यारी सियासी पार्टीयां रा नेता उम्मीदवारां रा प्रचार सारू पूरो जोर लगा दीनो। मुख्यमंत्री भजन लाल शर्मा चौरासी अर सलूंबर मांय भाजपा रा उम्मीदवारां री हिमायत मांय विजय संकल्प सभावां ने सम्बोधित कीना। वे कहयो के भाजपा आदिवासियां रा भला सारू लगातार काम कर रही है, जदके कांग्रेस रो आदिवासियां रा भला ऊं कोई लेणा—देणो नी है। मुख्यमंत्री कहयो के राज्य सरकार वागड़ हलका रा विकास माथे खास ध्यान दे रही है। वे प्रदेश मांय बेरोज़गार नौजवानां रा भला सारू करी ज्या जतन री चर्चा करता थकां कहयो के राज्य मांय राज्य मांय सरकारी नौकरियां सारू अब टेमसर अर साफगोई सागे भर्तियां व्हेला। भाजपा रा कई आला नेता अर राज्य सरकार मांय मंत्री ई पार्टी रा उम्मीदवारां रो प्रचार कीनो। दूजी कानी विधानसभा मांय विपक्ष रा नेता टीकाराम जूली रामगढ़ विधानसभा हलका मांय न्यारी—न्यारी ठोड़ां चुनावी सभावां ने सम्बोधित कीना। कांग्रेस पार्टी रा कई और नेता ई पार्टी रा उम्मीदवारां रो प्रचार कीनो। खींवसर मांय राष्ट्रीय लोकतांत्रिक पार्टी रा संयोजक हनुमान बेनीवाल अर चौरासी मांय भारत द्राइबल पार्टी रा सांसद राजकुमार रोत आप—आप री पार्टी रा उम्मीदवारां सारू न्यारी—न्यारी ठोड़ां नुक़ड़ सभावां अर जनसंपर्क कीनो। चुनाव प्रचार रो काम पूरो व्हयां पाछे अब उम्मीदवार घर—घर जा र प्रचार कर सकेला। काल संवारे पोलिंग पार्टीयां री रवानगी सरु व्हे जावेला। बुधवार ने दौसा, रामगढ़, झुंझुनू, चौरासी, खींवसर, देवली—उनियारा अर सलूम्बर विधानसभा हलकां मांय उपचुनाव सारू संवारे 7 ऊं सिंज्या 6 बज्यां तांई वोट पड़े ला।

000

प्रधानमंत्री नरेन्द्र मोदी कहयो है के दुनिया भारत रा नौजवानां रा बूता माथे ध्यान दे रही है। प्रधानमंत्री आज गुजरात रा वड़ताल मांय श्री स्वामीनारायण मंदिर री 200वीं वर्षगांठ रे मौके राख्यी ज्या कार्यक्रम मांय बोल रह्या हा। वे कहयो के दुनिया रा नेतावां ने भारत रा नौजवानां री कुशलता माथे भरोसो है अर भारत रा नौजवानां री मांग दुनिया मांय बध रही है।

.....
प्रधानमंत्री जनता ऊं विकसित भारत रो नजरियो अपनावण अर आवता 25 साल मांय भारत ने विकसित देश बणावण मांय योगदान देवण रो आग्रह कीनो। श्री मोदी कुशल मजूरां री नुवी पीढ़ी विकसित करण सारू सरकार री कोशिशां रो जिकर ई कीनो।

000

भारतीय विदेश व्यापार संस्थान—आईआईएफटी रो नुवो कैम्पस संयुक्त अरब अमीरात रा दुबई मांय खोल्यो जावेला। केन्द्रीय वाणिज्य अर उद्योग मंत्री पीयूष गोयल आज नई दिल्ली मांय ई संस्थान रा 57वां दीक्षांत समारोह रे दौरान वर्चुअल तरीका ऊं बोलता थकां आ जाणकारी दीनी। वे कहयो के भारत रो भविष्य नौजवानां रा हाथ मांय है अर देश री युवा पीढ़ी कांई ई करण रा बूता मांय भरोसो करे है। श्री गोयल कहयो के आज जवान भारत दुनिया सामी पूरा भरोसा सागे ऊबो है अर ओ देश रा 140 करोड़ रेहवासियां री किस्मत बदलण रो मौको है।

000

राइंजिंग राजस्थान ग्लोबल इन्वेस्टमेंट समिट रा तैत काल जयपुर मांय आईटी अर स्टार्टअप प्री—समिट राख्यी जावेला। इण मांय मुख्यमंत्री भजनलाल शर्मा ई शिरकत करेला। राज्य रा सूचना अर प्रौद्योगिकी मंत्री कर्नल राज्यवर्धन राठौड़ ई ई कार्यक्रम मांय मौजूद रहवेला। प्री—समिट मांय तकनीक अर नवाचार रा हलका मांय निवेश रा न्यारा—न्यारा करार माथे सही करी जावेला। ई कार्यक्रम रा तैत डिजिटल राजस्थान यात्रा ने झाँड़ी बता रे रवाना करी जावेला अर स्टार्टअप्स ने फंडिंग रा वैक दिया जावेला। सूचना प्रौद्योगिकी अर संचार विभाग री शासन सविव अर्चना सिंह बतायो के दो सत्रां मांय व्हेवण वाळी प्री—समिट मांय प्रदेश मांय डिजिटल बदलावां री संभावनावां रा बारा मांय ई चर्चा करी जावेला।

000

राजस्थान पुलिस अकादमी अर संयुक्त राष्ट्र जनसंख्या कोष री ओर ऊं काल जेंडर आधारित हिंसा अर नुकसानदायक रीतियां रा बारा मांय संवाद कार्यक्रम राख्यो जावेला। अकादमी रा निदेशक एस सेंगाथिर बतायो के ई कार्यक्रम मांय यूएनएफपीए री भारत री प्रमुख प्रतिनिधि एण्ड्रिया एम वोज्नर अर न्यारा—न्यारा हलकां रा अहलकार सिरकत करेला।

ई कार्यक्रम रो मकसद लिंग आधारित हिंसा रो सामो करण सारु बहुक्षेत्रीय तालमेल बधावण वाळा समाधानां माथे चर्चा करणो है। एडीजी सेंगाथिर बतायो के पैनल चर्चा अर संवाद रे मार्फत रोकथाम रा उपायां माथे विचार करयो जावेला।

000

न्यायमूर्ति संजीव खन्ना आज भारत रा मुख्य न्यायाधीश ओहदा री शपथ लीनी। राष्ट्रपति द्रौपदी मुर्मू वां ने राष्ट्रपति भवन मांय राख्यी ज्या एक जळसा मांय शपथ दिराई। वे सुप्रीम कोर्ट रा 51वां मुख्य न्यायाधीश है। शपथ लेवण रा जळसा मांय उपराष्ट्रपति जगदीप धनखड़, प्रधानमंत्री नरेन्द्र मोदी, केई केंद्रीय मंत्री अर सुप्रीम कोर्ट रा जजां समेत नामी लोग मौजूद हा। प्रधानमंत्री नरेन्द्र मोदी न्यायमूर्ति खन्ना ने सर्वोच्च न्यायालय रा प्रधान न्यायाधीश ओहदा री शपथ लेवण परां शुभकामनावां दीनी है।

000

मुख्यमंत्री भजनलाल शर्मा देवलोक व्हया पैली वाळा सांसद महेन्द्र सिंह मेवाड़ ने आज उदयपुर मांय फूल चढ़ा रे सिरधाभाव सागे याद कीना। वे महेन्द्र सिंह मेवाड़ रे देवलोक व्हेवण परां दुःख जताता थकां वां रा पिरवार वाळां ने ढाढस बंधायो। ई मौके भाजपा रा प्रदेश अध्यक्ष मदन राठौड़, सांसद सीपी जोशी, विधायक ताराचंद जैन, फूलसिंह मीणा अर श्रीचंद कृपलानी समेत जनता रा केई नुमाइंदा अर अहलकार मौजूद हा।

000

झालावाड़ ज़िला रा झालरापाटन मांय राज्य स्तर रो श्री चन्द्रभागा (कार्तिक) पशु मेलो काल सरु व्हेला। 20 नवम्बर तांई भरण वाळा ई मेला रो ज़िला कलेक्टर अजय सिंह राठौड़ उद्घाटन करेला। म्हाणा खबरनवीस बतायो के ई सागे ई झालरापाटन मांय तीन दिन रो पर्यटक मेलो ई भरेला।

दूजी कानी बाड़मेर जिला रा शिव हलका रा कोटड़ा गांव मांय भर रह्या राणा बाघ जी रा पशु मेळा मांय ऊंटां अर घोड़ां री खरीद-फरोख्त करी जा रही है। मेळा मांय ढांढ़ा-ढोरां रा करतब सग़लां रो ध्यान खींच रह्या है। ओ मेळो 14 नवम्बर ने पूरो व्हेला।

पुष्कर मांय चाल रह्या मेळा मांय केन्द्रीय संचार ब्यूरो री ओर ऊं मल्टीमीडिया प्रदर्शनी लगायी ज्यी है। ई मल्टीमीडिया प्रदर्शनी मांय केंद्र सरकार री न्यारी-न्यारी योजनावां अर कार्यक्रमां री जाणकारी दी जा रही है। ई रे अलावा मोशन गेम, वर्चुअल रियलिटी रो अनुभव देवण वाला वीडियो अर ऑनलाइन किंवज ई राख्या जा रह्या है। केंद्रीय संचार ब्यूरो, अजमेर रा सहायक निदेशक पराग मांदले बतायो के 15 नवम्बर तांई चालण वाली आ मल्टी मीडिया प्रदर्शनी संवारे 11 ऊं रात 10 बज्यां तांई देखी जा सके है।

000

त्यौहारां रा मौसम मांय मुसाफिरां रा सुबीता सारू रेलवे त्यौहार विशेष रेलगाड़ियाँ चलावण रो ऐलाण कीनो है। ई रा तैत तहत दिल्ली जंक्शन ऊं कोलकाता बीचे आरक्षित सुपरफास्ट त्यौहार विशेष एक्सप्रेस ट्रेन, दिल्ली जंक्शन ऊं लखनऊ बीचे त्यौहार स्पेशल एक्सप्रेस, दिल्ली ऊं वाराणसी बीचे खास रेलगाड़ी चलाई जावेला। ई रे अलावा दिल्ली ऊं छपरा तांई एक तरफा स्पेशल रेलगाड़ी चलाई जावेला।

000

भीलवाड़ा जिला मांय बड़लियास पुलिस एक गाड़ी ऊं 936 किलोग्राम 860 ग्राम अफीम डोडा चूरो जब्त कीनो। पुलिस एनडीपीएस कानून रा तैत मामलो दर्ज कर र फरार तस्कर री तलाश कर रही है। एस.पी. धर्मेंद्र सिंह बतायो के विधानसभा उपचुनाव ने ध्यान राखता थकां नशीली चीजां री तस्करी री रोकथाम सारू खास अभियान चलायो जा रह्यो है।

000

नशा रा गलत असर रा प्रति जागरूकता बधावण सारू हनुमानगढ़ जिला रा टिब्बी मांय आज मानस अभियान रा तहत ब्लॉक स्तर री भाषण प्रतियोगिता राख्यी ज्यी। होड़ मांय 'नशे के कारण महिलाओं पर हो रही हिंसा' मुद्रा माथे कॉलेजां रा विद्यार्थी शिरकत कीनी। जिला स्तर री होड़ 18 नवम्बर ने राख्यी जावेला।

000

भारतीय अंतर्राष्ट्रीय फिल्म महोत्सव—आईएफएफआई रो 55वों संस्करण 20 नवंबर ऊं गोवा मांय सरू व्हेला। सूचना अर प्रसारण राज्य मंत्री डॉ. एल. मुरुगन आज नई दिल्ली मांय खबरनवीसां ने आ जाणकारी दीनी। डॉ. मुरुगन कह्यो के सिनेमा देश री माली व्यवस्था ने आगे बधावण मांय मोटो काम कर रह्यो है।

सूचना अर प्रसारण मंत्रालय रा सचिव संजय जाजू कह्यो के ई साल फिल्मां बणावण वालां माथे खास ध्यान दियो जा रह्यो है। जाजू कह्यो के ई साल सर्वश्रेष्ठ भारतीय नवोदित निर्देशक रो नुवो इनाम सरू कर्यो जा रह्यो है।

000